

Pitago Hasia Pas Deli Aseani

Hasia nedebo tau sabo po

Te bidi Jisas wali pali bidi nogo si olama saꝓaꝓo si bidi dabe tomode te bidi Pita bidali. Tama te bidi Pita nosali te Kraisgo po wali pabo we bidi hani dabe tomode te genuai bidi pedalali. Tama agai e pas te digibulu moni tꝓ pedai a naga tede bidali Godigo we bidi hani augwalibolo aseña tolali. Magi baso meni, te sogo te Rom gavman me, te haniani olo we bidi me, augwali tigidaligo te Kraisgo po wali pali we bidibolo genuai seꝓe dali dene dali mayu bidali. Tama tibaso, te bidi Pitago homugo agai te augwali homu hodolobo bomo mabo po augwalibolo pusa mawaibao. Augwaligo te haniani seꝓe tolobadi, tama augwa hasi dali yabo kolesaga me, te gasa we bidi dali yabo kolesaga me, te gavman dali yabo kolesaga me, te tigidalide Pitago augwalibolo te tau sabo po e pas tomode aseñama tama tolali.

Da te Godigo hani we bidi mu pedelai baso, tama dago te wiegi yai kolesaga dabe eyu, te dago dwagi yai nai dabe saiba homu eyu tonaluinao

(Dqı 1:1–2:10)

1 ¹Ena da Pita da, te Jisas Kraisgo tagala palai bidi me deli dao. Tama te dage haniani gasa tedali bulude bidibo we bidibolo eno e pas aseña tolobao. Dage meba te moni tꝓ nogi Pontus tede bidibao, meba te moni tꝓ Galesiade me, meba te moni tꝓ Kapadosiade me bidibo, meba te moni tꝓ Esiade me bidibao, meba te moni tꝓ nogi Bitiniade me, dage te tꝓde bidalubo, tede osogo bidibo we bidi tiwai bidibao. ²Dago Aya God agai dage polobadu mu konebaso, agai dage hagea sai dao. Tama agai Mobo Bidigo dage doloba pai mu iliyu, tama dage wiegi yai kolesaga naga eyu bididuyu tama dage Jisas Kraisgo po odoyu, agai aga kanemego dagego yali dwai seꝓ sela saꝓainogo, God agai dage koneyu polobadu hagea sai dao. Tama eno homugo God agai olo tau sabo kolesaga dage dali genuai mu elama, tama dage bugagia mu bidao.

³Te dago dena Genuai Bidi Jisas Kraisgo Aya God aga nogi dago ugwaba sinao. Agai da moni homu dene mu eyu, tama da tau somainogo, agai Jisas Krai te isai bidi dabe bidibo digi tomodu ma hodolali. Tebogo dabolo te gesi noma ula mawai. Tama menama, da dwagi yai homu eyu, bugagia tonaluyu bidalubao. ⁴Aga bidibo digi dage maiabo nai agai dagala munama, megi bugagia tonalubo dao. Tama agai dagebolo maiabo nai te gamonabo nai dao, te dwai sego dolisiabo nai dao, te nai munu me mobia pogobeo. ⁵Tama dagego duga homu tigidali te Krai agaba mubaso, God agai bomogo dage bugagia tonalubao. Tama nosali te tigidali nai silabo bodolu mani sogo pedalobo si, agai te we bidi ma dobola sabo kolesaga polobadu sisi ela muani te sogo waselaibao. Tama tibaso, megi agai dage bugagia tonalubao.

⁶Tama agai dage dali te se ebode dage moni dwagi yai homu mu ebo dao. Godigo te dage usu sabo se pedalama gogolama, tama dage homu osogo dene ebao. Tiali digi, dage moni dwagi yai homu mu ebo dao. ⁷Tama te haniani dene mabo se augwaligo page elalubao. Dage duga homu tigidali Godiba muani se, te se usu somainogo te dene mabo se dageba pedalobo dao. Eno megi te wiegi yai kapa nogi gol te naide po digi po begelama obao. Augwaligo te kapa gol te tode diganama, tama te dwai nai sela sawainogo augwaligo te gol siade ulubo dao. Siago uludama, tama nosali te wiegi yai kapa gol naga pedalama, augwaligo saibao. Tama te gol te osogo wiegi yai nai dao, te tode elalubo nai dao, tama nosali te nai mu dolaibao. Tiali goli dagego duga homu tigidali Godiba mubo se te wiegi yai mu dao, tebogo te kapa gol aiyaba elalubo dao. Tialigo da, dagego konealubo po daq wabo kolesaga usu selama, tama usu baso, te Jisas Krai aga ma asobo hanilabo sogode te Godigo dagego nogi ugwaba mu siyu, dagebolo dwagi yai genuai nogi mawaibao. ⁸Tama dagego duga gedugo aga munu me susiawai digi, dagego Krai de dwagi yai homu eyu godolo ebo dao. Dagego megi me aga susiabadi digi, dagego duga homu tigidali agaba muyu, tama wiegi yai homu mu ebo dao. Tebogo te tigidali gasagi yai dwagi yai homu ebo aiyaba elalubo dao. Tama te dagego wiegi yai homu ebo te genuai mu dao, augwaligo Godigo bidibo digide ebo wiegi yai homu ebo sabi si dao. Tama tialigo da, dagego pedauwaligo tede po wabo usu egobeo. ⁹Tama God agai dage ma dobola saibao homu eyu, megi dagego Krai susiabadi digi dagego duga homu tigidali agaba muyu, tama God agai dage ma dobola sabo se eyu bididubao.

¹⁰Te Godigo dage ma dobola sabo se, polobadu mu te se de te Godigo nosali yabo se po pusabo profet bidi dabe augwaligo te se de bomo eyu osola suali, te se pagede dua dua eyu hanalu wali, augwaligo te se page kuna konemainogo yai. ¹¹Tama Kraisgo Mobo Bidi agai augwaligo homu tomode hanilama, te po widu geai, "Te Godigo sa muani nosali asaibao

wali bidi Kraiſ agai dene selama, tama nosali agai te genuai bomo yai ula me saibao,” te po wai. Tama augwaligo te pode homu konea peyu, te po hanalu wai, “Te ſe niſu pedalaibawe, mena ſide pedalaibawe?” te po wai. ¹²Augwaligo te po hanalu wali digi, tama God agai augwalibolo waselama, tama augwaligo koneai, augwaligo po pusubo ſego augwa digi tau ſabo ſe meni, te dage nosali bidabo we bidi tau ſabo ſe dao. Tama augwaligo te ſe eyu, augwaligo te polobadu sogo mu pusali po dagego tamadi odali. God agai aga Tedali Mobo Bidi aba tagala palama, tama agai gasa bidi dabe tau siyu, augwaligo Godigo dwagi yai po dagebolo pusagasai. Tama te ſede te Godigo dagalude ſe ebo enſel bidi dabe augwaligo bomu eyu, te ſe page kuna koneaio homu ebo dao.

¹³Te God agai dage dali te ſe yaligo da, te bidi me ſe yai hagede aga ugwa ſugwa ſabo tiwai, dagego duga homu bugagia dodola selama daſu wao. Tama dage deli deli duga digi bugagia tonaluaſo, te homu keſnai we bidi bidao. Tama te Jiſas Kraiſ aga aſobo hanilabo sogo agai dagebolo te wiegi yai olo tau ſabo ſe mawaibao. Dagego tede duga homu bugagia daſu olama, dwagi yai homu eyu tonaluaſo.

¹⁴Dage Godigo po wali pabo we bidi bidibaſo, dagego God koneſiaſbadi polobadu yali dwai dwai koleſaga wali ma pigimio. ¹⁵Te menio. Te dage i wali God aga da, te tedali mu doloba pai bidi bidibaſo, dage me tigidali koleſagade mu doloba pai we bidi bidao. ¹⁶Magi baſo meni. Te Godigo bukude e po aſeſani, “Ena tedali mu doloba pai bidi bidibaſo, teda dage tedali mu doloba pai we bidi bidao.”^a

¹⁷Tama nogi yai bidi dali, nogi meni yai bidi dali God agai po tu ebo ſogode dagalama egobeo. Te meni. God agai we bidi po tu eyu oſola ſubo ſi, agai augwaligo yali ſe naga oſola ſubo dao. Tama tibaſo, dagego agade dago Aya waligo da, teda dage e tu ebo oſogo bidibaſi, agade wi eyu aga dologode bidao. ¹⁸Magi baſo meni. Dagego waſigo dagebolo polobadu ola mani bidabo koleſaga te uſu iſiaſbo koleſaga dao. Tama dagego koneai, God agai dage te uſu iſiaſbo koleſagade ma dobola siyu, agai te mobi elama damua pabo nai mego agai dage ma abela ſabeo, te dila pai kapa ſi nogi gol dali ſilwa dali ſi, te tobage gamonaſiaſbo naigo dage ma ſabeo. ¹⁹Te meni. Te Kraiſgo kanemego agai dage abelama, tama ma dobola selama, tama megi dage olo mu bidibaſo. Tama aga kaneme te dila pai nai mu dao. Kraiſ aga te wiegi yai kibu ſiſip wai tiwai bidali, te ſiſip wai aga tigi dwai naigo dolyu huſugu yai digi te menio, te Godibolo te ofa mabo ſiſip uſu dao. ²⁰Tama God agai e tu nigiaſbadi, polobadu mu agai aga koneama tama te ſe yabode ſa muani. Me ma megi e nosali sogo agai aga dage tobade waselai dao. ²¹Tama tiyu, Godigo aga te gu pageſe ma hodolama, agabolo genuai ula yai nogi mawai dao. Tama tiwai ebaſo,

^a 1:16 Prs 11:44-45; 19:2

agadu dagego duga homu tigidali Godiba muyu agade mu daŋ wali. Tama duga homu tigidali Godiba munama, tama agai dage dali wiegi yai se yabo sogo dagego dwagi yai homu eyu tonalubo dao.

²²Te dagego Godigo wiegi yai mu po bugagia wali peyu tama duga homu kolesagade elaluali dwai kolesaga sela şanama, tama dagego duga hasi we bidide dwagi yai homu ebo gagalali. Tama tiyu, megi dage bomo eyu, homu mu elaluyu duga hasi godolo mu yao. ²³Awe, duga hasi godolo mu yao. Magi baso meni. Dagego te gesi noma bidabo ula sai dao. Tama te dagebolo te gesi noma bidabo ula mani nai te gamonasiabo nai menio, te gamonabo nai mu dao, te Godigo bidabo ula mabo bidada peyu, bidada pabo po, te pogo dagebolo te gesi noma bidabo ula mawai dao. ²⁴Tama Godigo pode te bukude aşani po me deli e dao, “Te tigidali we bidi osogo naga bidibo dao, te noswai tiwai. Tama augwaligo genuai nogi me te osogo naga elalubo dao, te noswai aga duduli tiwai. Te noswai holama, sasia peyu, aga duduli me tegasa dulaibao. ²⁵Tiali goli te Genuai Bidigo po bidada peyu, bidada pabo dao,” te po aşani. Tama te po da, te augwaligo dagebolo pusagasali wiegi yai gesi po dao.^b

2 ¹Tama God agai dage te gesi noma bidabo ula mobaso, dagego te gasa bidi dabe dene mabo kolesaga tigidali tagalama, sela şayao. Tigidali tibo kolesaga dali, te ugwadu homugo tibo po wabo kolesaga dali, te si tagalao. Tama gasa bidigo doado bage me, te agai ebo se dali sigo dage aiyaba elaluyu, tama tibaso dagego te bidi aga dali dwai homu elama tama aga dali sebe egio. Te gasa we bidi nogi posobo po weyu ebo, te kolesaga me dagego tagalao. ²Te tobage dwai se egimio. Te menio. Te tamadi ame nani wai boŋ aga bomo eyu, te ame pe naga tuabo homu ebo dao. Tama dagego homu te wai boŋgo homu ebo tiwai gilama, dagego Godigo po naga sao, te gasa po dali talusiawai po dao. Te po naga sao. Tama tiyu, dage bugagia holoyu bidao, te God agai dage ma dobola sabo se silabo sogo tonalua. ³Tama dagego te Genuai Bidigo dage dali ebo dwagi yai se sulama koneai dao.^c

Genuai Bidi aga te bidabo ula elalubo genuai masigi tiwai dao

⁴Te eno megi te bede po digi po begelama obao. Dage te dago Genuai Bidi Kraisi aga pageba asiyo. Aga da te bidabo ula elalubo masigi tiwai dao. Tama bidi dabe augwaligo agade “Te olo masigi dao” homu eyu, aga sela şawai goli, te Godigo gedude aga da te wiegi yai masigi mu dao, te Godigo aga deli hagea sali. ⁵Tama bidi me deligo aga bidabo be te masigigo se ebo tiwai te Godigo dage aga we bidi hani ilibo dao. Tama tiyu, dage tedali gasagi yai magi se isiawai we bidi hani bidaibao, te pris bidi hani tiwai. Tama te pris bidi dabe

^b 1:25 Ais 40:6-8 ^c 2:3 Tib 34:8

augwaligo Godibolo dwagi yai nai ula mabo şe eyu, tama agabolo ofa nai mabo dao. Tama tede Godigo dwagi yai homu ebo dao. Tama te tiwai me Kraiş agai dage tau selama, dagego Godigo homu wali peyu dwagi yai şe yaibao. Tama dagego te dwagi yai şe te tiwai ebaso, God agai te dagego ebo şede dwagi yai homu yaibao. ⁶Te eno po digi po begelama wali pode, te Godigo po bukude te Godigo wali po te bidi me deligo tama aşani,

“Odişo. Te eno masigi dabego te be nigiyu, tama eno te wiegi yai dila pai masigi me deli selama, tama ‘Te be bugagia daş wabo masigi dao’ weyu, eno te dila pai masigi te şeba daş ilali elalubao, te bulu nogi Saion tede munalubao. Tama bidigo aga homu tigidali agaba mubaso da, te bidi hale munu me egobeo,”^d

te po aşani. ⁷Tama dage duga homu tigidali agaba muani bage, te dagego gedude te aga wiegi yai mu da. Tiali goli te agaba augwaligo homu musişwai bage, augwalide te bukude aşani po tama dao,

“Te be şe ebo bagego polobadu sela şawani masigi, te masigi megi te bede te genuai nogi elalubo masigi pedalai dao,”^e

te po aşani.

⁸Tama te bukude aşani po me dao,

“E masigi da, te we bidi augwali şaş dani tuşbo masigi dao, te augwali te tuşba tula muabo genuai masigi dao.”^f

Tama augwaligo Godigo poba augwa homu tigidali musişbaso, tama augwali tulalubo dao. Te God agai polobadu augwali te şeba muani.

⁹Me ma, dage da, dage te sa muani we bidi hani dao. Bidi meba augwali te we bidi dali, God dali tomode bidiyu, tama pris bidi şe eyu, augwaligo Godibolo te dwagi yai nai ula mabo şe ebo dao. Tama te tiwai dagego me te dago genuai tuni bidigo şe ebo dao. Dage da, te tedali gasagi yai doloba pai we bidi hani dao, God aga we bidi hani mu te dage dao. Tama agai dage i olama, tama dage te hulua sai bidibo digi tagalama, tama agai wiegi yai ula yai buluba bidagasai dao. Tama dagego agai yali wiegi yai şede po te gasa we bidibolo pusumainogo te agai dage sa muani.^ş ¹⁰Polobadu dage we bidi hani meni yai goli, megi dage te Godigo we bidi hani dao. Polobadu dage agai homu dene eyu tau sisişwai goli, megi dage agai homu dene eyu tau sai dao.^h

^d 2:6 Ais 28:16 ^e 2:7 Tib 118:22 ^f 2:8 Ais 8:14-15 ^ş 2:9 Sai 19:5; Bom 4:20; 7:6; 14:2; Tai 2:14 ^h 2:10 Hos 2:23

Da te gasa we bidi tomode bidu te doloba pai kolesaga naga inao

(Daq 2:11–3:22)

¹¹Eno abagi dede mu, eno dage tau somainogo bomo eyu e po dagebolo obao. Dage da e t̄ba tamadi tama asai osogo bidibo we bidi dao. Tama tibaso, dago tigigo e t̄de ebo dwai dwai s̄ egimio. Te tobage dwai s̄ dabe augwaligo da aiyaba elalui hagede da dali hw̄bo dao. ¹²Tama dage te God konesiawai we bidi tomode bidiyu, tama dwagi yai kolesaga naga yao. Magi baso meni. Augwaligo dage dali nogi posobo po weyu, “Dage dwai s̄ ebo we bidi dao,” po weyu da, teda augwaligo dagego dwagi yai s̄ naga ebo sulama, tama nosali te Godigo po t̄ yagasabo sogo asobo si augwaligo aga nogi ugwaba siyu te po waibao, “Ao, agai po wali pabo we bidi augwaligo dwagi yai s̄ yalio.”

¹³Te augwaligo gedude te dago Genuai Bidigo nogi tulaluidali weyu, augwali tigidali tuni bidi dologode dage bidao, augwaligo po wali pao. Tama tiyu, tama te genuai gavman tuni bidi dologode bidiyu agai wabo po odiao. ¹⁴Tama te tuni bidi agai aga s̄ bugulama, tama te me me t̄ pedai tonalubo s̄ gasa bidi dabego nogoba muani, te augwaligo te dwai s̄ ebo bage dene mayu, tama te dwagi yai s̄ ebo we bidi nogi ugwaba somainogo ebo dao. Tama dage augwali me dologode bidiyu, augwaligo po odiao. ¹⁵Te Godigo homugo te dage te tuni bidi dabe dologode bidiyu, tama dagego te dwagi yai s̄ naga ebogo te homu kolesaga meni yai bidi dabego kedu meni yai po wabo pedauwali daq̄ waibao. ¹⁶Tama dage God dali daq̄ olama, tama dage da aga olo s̄ ebo we bidi dao. Tama te dwai s̄ ebo kolesagago dage daq̄ waidali weyu, dage bugagia olo bidao. Tiali goli olo bidibadi dagego te homu egimio, ‘Te da olo bidibaso, tama dago dwai s̄ eyu da, te usu dao,’ te homu egio. ¹⁷Tama dage tigidali bidi dali augwali nogi ugwaba sabo homu eyu, augwali dologode bidao. Godigo we bidi hani dali dwagi yai homu eyu, godolo mu yao. God aga wi eyu, tama aga dologode bidao. Te gavman tuni bidi aga nogi ugwaba muyu, aga dologode bidao.

¹⁸Te dage masigi sis̄bo s̄ ebo we bidi, te dagebolo s̄ mabo bidi dabe wi eyu, augwali dologode bidao. Tama dage te dwagi yai nagamea pai bidi dologode naga bidigobe. Te sesena pai bidi dologode me dage bidiyu, augwaligo po odiao. ¹⁹Tama tiyu, te dagego genuai bidi me deli agai dage dali dolo s̄ esiayu, dene mayu da, teda dage Godigo homude homu konea peyu te seḡe bugagia tolao. Tama dage tama tiyu da, teda God agai dage dali dwagi yai homu yaibao. ²⁰Me ma, dage dwai s̄ idu geyu, tama augwaligo nogogo dage elama, tama dagego te seḡe bugagia toloyu da, te mena bidigo dagego nogi ugwaba saibawe? Bidi meni. Tiali goli, me sogo dage dwagi yai s̄ yai goli augwaligo dage dene mawaibao. Tama te sogo

dage nagamea homu eyu, te seḡe bugagia toloyu da, teda God agai dage dali dwagi yai homu yaibao.

²¹Tama dagego te seḡe bugagia tolomainogo, God agai dage i wali. Magi baso meni. Kraisi aga digi dage tobade dene sai. Tama aga tama tiyu, dagebolo te seḡe page agai bugagia hanilama ola mawai, dage aga tiwai gilama, bugagia paḡe wali asomainogo yai. ²²Tama tiyu, agai magi dwai seḡe munu me ebe, te tibo kolesaga eyu tibo po me deli digi wabeo.ⁱ ²³Augwaligo aga dali dwai dwai po wabo si agai augwali dali dwai po wei ponobe, sagia sai. Tama augwaligo aga dene maidu gebo si, agai te boi bidi homu eyu, po wei munu me ponobeo. Woo. Te menio. Aga te homu yali, ‘God agai te augwaligo ena dali yali seḡe te po tuḡe dolo mu yaibao,’ te homu yai. Tama te homu eyu, agai te po tuḡe yabo seḡe Godigo nogoba maidu geai.^j ²⁴Tama aga digi agai dago yali dwai seḡe aga tigigo selama, tama te niba ḡuḡe wagi pai. Tama tiyu, agai homugo dago te dwai seḡe ebo kolesaga tagalaibao, te isai bidigo dwai seḡe ebo tagalali gilama. Tama dago te dwai seḡe ebo tagalama, tama dago doloba pai kolesaga naga eyu bidaibao, te me aga homu dao. Tama augwaligo aga tigi doloyu dene mawai, tama tebogo da tau selama dwagi yai ilali.^k ²⁵Tama polobadu dage te kibu sipsip tiwai eyu, augwali tonalubo bidi tagalama tama hagawai digi, megi dage ma geasa asiyu, te dage bugagia tonalubo bidi pageba ma asai dao.^l

We aga bidi dali bidibo po

3 ¹Te da te tigidali tuni bidi dologode bidabo po tama wali peyu, tama dage we dabe sibi dage deli deli duga bidi dologode bidiyu aga po odao. Tama tiyu, te bidi meba augwaligo Godigo dwagi yai po odobo hagela yai digi, augwaligo wego wiegi yai kolesaga ebo suyu, te wego po mobo masiḡawaj goli te bidi augwa homu begelaibao.^m ²Tama te we dabe augwali Godide wi eyu aga dologode bidibo, te magi dwai seḡe isiḡe kolesaga te bidi dabe augwaligo subaso da, teda augwaligo homu tulaluama, tama Godigo po mu po dao te homu yaibao. ³Tama dage we dabe sibi, dagego duga tigide bulu badu eda badu au ebo seḡe tede te moni homu egimio. Tama tiyu, duga tobolu nisi dali haniani seḡe eyu au egio. Te wiegi yai kapa nogi gol tego nigali tigi au yabo nai dali, te wiegi yai bobobage ugwa dabe dali, te tobage naigo duga tigi au eyu tama gasa we bidigo suyu, dage wiegi yai au yai we dao te po omainogo munamuo. Te meni.ⁿ ⁴Te tobage au yabo nai te osogo naga elalubo nai dao. Dagego au yabo nai te gasagi yai mu dao. Te dagego homu kolesaga tomode geme dualali au yabo gasagi yai nai mu tedali elalubo dao. Tama dage nagamea

ⁱ 2:22 Ais 53:9 ^j 2:23 Ais 53:7 ^k 2:24 Ais 53:5 ^l 2:25 Ais 53:6 ^m 3:1 Ef 5:22; Kol 3:18
ⁿ 3:3 1 Ti 2:9

pai homu eyu, dua bidabo kolesaga elalubaso, teda te gamonabo au yabo nai mu dao, tama Godigo gedude te wiegi yai dila pai nai mu dao. ⁵Te polobadu bidai we dabe sibi augwali te tama tiwai bidai dao. Augwali dwagi yai homu eyu, God agai augwali dali dwagi yai şe ebo sogo bugagia tonaluali. Tama tiyu, augwali nagamea pai homu eyu dua bidabo kolesaga ebadi, augwali deli deli augwa bidi dologode bidai dao. ⁶Te polobadu mu bidai we nogi Sara agai tama tiyu, tama aga bidi Abraham dali te nage da eno genuai bidi dao weyu, agai wali po bugagia wali pai dao. Tama dage me, dage Sara tiwai dwagi yai şe eyu da, tama te homu wi ilabo naide wi esiayu da, teda dage me te Sara aga wegi hani mu dao.^o

⁷Te dage we sai bidi dabe me, dage Godigo we bidi hani dali dwagi yai homu eyu, tama dage deli deli duga we dali tau sabo homu eyu, abagi homu eyu, bugagia bidao. Tama dagego koneani, te bidi me aga we me augwali sibolo God agai te bidada peyu, bidada pabo bomo olo mawaibao. Tama dagego augwali bomo genuai meni homu ebadi, te bidi agai aga wego nogi ugwaba sao. Bidigo tama tiyu bidibaso da, teda Godigo augwali sigo aga hanalu wabo po odaibao.^p

Dwagi yai şe yai goli dene sabo po

⁸Te eno po silagasu po obao. Dage tigidali deli homu naga eyu bidişo. Tama teyu, hobede eyu, te dage Godigo hani we bidi bidiyu, duga hasi dwagi yai homu eyu godolo mu yao. Tigidali we bidi dali homu dene eyu, tama nagamea pai homu ebadi bidao. ⁹Bidi mego dage dali dwai şe ebo si, tama dagego dwai şe eyu ma wei ponogio. Ma, bidi mego dage dali dwai dwai po wabo si, dagego te dwai po me weyu wei ponogio. Te menio. Dagego God hanalu wabo po wao, agai augwali dali dwagi yai şe emainogo yao. Te God agai dagego te tobage şe emainogo dage i wali dao, tama nosali agai dagebolo dwagi yai kolesaga mu yaibao. ¹⁰Magi baso meni. Te polobadu mu bidi mego e po aşani,

“Niwai bidi agai homu ‘Ena dwagi yai homu eyu, tigidali sogo bugagia bidaio,’ te homu agai eyu da, teda agai dwai po olamuo, te we bidi dene maiabo tibo po wagio. ¹¹Me ma, agai dwai şe tudiba muao, te dwagi yai şe naga yao. Tama agai bomo eyu, te gasa we bidi dali bugagia bidabo sunumi gegegi pao, tama sulama aga te sunumi wali bugagia pao.

¹²Magi basowe? Te Genuai Bidi God aga gedugo te doloba pai we bidi dabe augwali bugagia tonaluyu, augwali dali dwagi yai homu ebadi, tama agai augwaligo hanalu wabo po odoyu, wei ponobo dao.

Tialima, te dwai şe ebo bage dali agai te boi bidi homu ebo dao.”^q

¹³Te dage bomu eyu, tama te dwagi yai şe yabo homu daş weyu da, teda tego dagebolo dene mawaibawe? Woo, te tobage şe ebo bidi hauwa meni. ¹⁴Tialima dagego te doloba pai şe yai goli te gasa bidi dabe augwaligo dage dene me sogo mayu da, teda God agai dage dali dwagi yai homu eyu dwagi yai kolesaga dage dali yaibao. Tama tibaso, dage augwalide wi egio, te augwaligo dage dali ebo şede me dage moni homu egimio. ¹⁵Te meni. Dage duga homugo “Krais aga da, dago Genuai Bidi mu dao” homu eyu, aga dologode mu bidao. Tama teyu, dagego duga homu hasia bugagia dodolama, tama me sogo bidi mego dagego Kraisde konealubo po page hanalu obaso da, dagego agabolo te konealubo po page bugagia ola mao.^r ¹⁶Tialima, te po page agabolo ola mobadi dagego wado po wagio. Te meni. Dage te nagamea pai homu kolesaga elama, tama aga dologode bidiyu, te konealubo po page agabolo ola mao. Tama timainogo dage te doloba pai kolesaga naga yao. Tama dagego tama tiyu da, te bidi meba augwaligo dage dali nogi posobo po weyu, tama dage Krais aga hani we bidigo ebo dwagi yai şede augwaligo ‘Te dwai şe dao’ po wabo bage, nosali augwaligo koneaibao, te pode augwaligo mu geda muani. Tama te koneama tama augwali ge neyu hale mu yaibao. ¹⁷Tama dago dwagi yai şe naga yai goli, tama God agai “Awe” weyu, te bidi dabe augwaligo dabolo dene mayu da, te usu dao. Tialima dago dwai şe elama tama augwaligo da dene mayu da, teda te dwali dao.

¹⁸Magi baso meni. Te Krais aga digi agai dago yali dwai şe şeş sela şamainogo aga deli sogo naga isali. Tama aga te doloba pai bidi mu bidai goli, tama agai da doloba pisişwai bage te God pageba sesimainogo agai da tobade dene sali. Bidi dabe augwaligo aga tigi isilali. Me ma Godigo Mobo Bidigo Krais bidimainogo ma hodolali. ¹⁹Tama te sogo Krais aga mobo bidigo te isali bagego noma bidi dabe kalabuside bidalubo madiba aga teba pelama, tama agai aga po augwalibolo pusali. ²⁰Tama polobadu mu te bage augwali e tşde bidibadi augwaligo Godigo po odobo hagela yai dao. Tama te sogo polobadu mu te bidi nogi Noa aga e tşde bidiyu, tama Noa agai te moni geba nigibadi te sogo Godigo te dwai şe yali we bidi dali şeş polo isişbadi tonaluali. Tama te moni geba nigibo şe silama, tama te we bidi isilabo moni aşı asali sogo, te we bidi hauwa te geba tomoba pelama bugagia bidibeo. Woo, te we bidi a naga olama me nogo sela naga augwali te sipde bidibadi te aşıdu sela bilama tama bugagia bidaligo sana pali. Tama tebogo Godigo augwali te aşıgo tau siyu ma dobola sali.^s ²¹Tama te aşı te augwaligo dage baptais mani aşı tiwai dao. Tama Jisas Krais aga te gş pagede ma hodalobaso, Godigo te baptais

mani aşıo dage tau siyu ma dobola sali. Te aşıo te dagego tigde elalubo meda sela sayu, tama dage tau siyu ma dobola sabo menio. Te meni. Te dagego te doloba pisişwai se idali weyu, tama dagego Godibolo te da tau sao po weyu, tama augwaligo dage baptais mawai dao. Tama te tiwai ebogo dage tau siyu ma dobola sabo dao. ²²Tama te Jisas Kraıs aga te gu pagede ma hodolama, tama Godigo dagalude bidibo madiba sabolama tama genuai nogi sobaso, aga te Godigo dolo nogo badu megi bidibao. Tama aga tede bidiyu, tama ensel mobo bidi dabe tigidali dali, te noma bidi tuni bidi dabe dali, te bomo yai noma bidi dabe dali, augwali tigidali Kraıs aga dologode bidibo dao.

Genuai usu sabo se te Godigo po wali pabo we bidi dabeba pedelama augwali te seşı tolali

(Daşı 4-5)

4 ¹Te bidi Kraıs aga tigde dene saligo da, teda dage bomu siyu bugagia bidimainogo eyu, dagego agai yali homu kolesaga tiwai gilama yao. Magi baso meni. Niwai bidi agai dwagi yai se yali goli aga dene siyu da, te bidi agai te dwai se ebo tagalai dao. ²Tama tiyu aga e tşde bidibo sogo tigidali agai e tşde we bidigo yabo dwai dwai kolesaga munu me egobeo. Te meni. Agai te Godigo homu naga wali peyu bidaibao. ³Tama polobadu te dagego te tşde bidibo we bidigo ebo dwai dwai se hauwa sogo yai dao. Tama tiyu, dagego te penani ebo se te we bidi gabidide hania idu geai dao. Tama dagego te dwai meda yai penani yabo homu eyu, tama te bomai aşı tulama te polobo bidi tiwai idu geai dao. Tama tiyu, te moni nai hauwa mu nogelama, te nai daa mu te ma tuyu, ma tuyu ela pedubadi, tama dagego te bomai aşı subigila tuyu, te polobo bidi tiwai pedaluyu, tama dwai se eyu bidai dao. Tama dagego te tibo god augwalibolo lotu po weyu tama augwaligo dage tau somainogo te dagego te dwai dwai penani ebo se te polobadu idu geai dao. ⁴Tiali goli megi te dagego polobadu abagi dabe augwaligo dagede noma siyu bidibao. Dage augwali dali kisasa biliyu, tama bomu eyu, te haniani dwai dwai se ela bilisşbaso, tama augwali noma siyu, dage dali te nogi posobo dwai po augwaligo wabo dao. ⁵Tialima, te po tş dodolobo bidi Kraıs aga tamadi asobo si, te agai te polobadu isali we bidi dali, te me bidibo we bidi dali si augwali tigidali dali agai te moni po tş yaibao. Tama te sogo te dage dali dwai po wabo bage augwaligo te bidibolo te nogi posobo dwai po wali po page pusulama, te pode te augwali dene saibao. ⁶Tama te Kraıs agai te isali we bidi dali me te po tş ebo sisi yai elaluyu, tama agai te polobadu isai we bidi dali me te Godigo gesi dwagi yai po pusigi pai. Magi basowe? Te God agai augwali osola sulama, tama augwali isali, te tigidali tşde bidibo we bidi tiwai. Tama augwaligo tigi isali goli,

augwaligo noma bidi te God tiwai bidimainogo Kraiss agai augwalibolo te Godigo po pusigi pai.

⁷Te tigidali nai silabo sogo te paşa yagasobao. Tama tibaso, dage te homu nagamea pai we bidi bidao, te dage God dali te hanalu wabo po gisiga omainogo te dagego duga homu bugagia tonaluyu bidao. ⁸Tama dagego genuai hasia yabo şe e dao, te dage bomu eyu, te duga hasi te dwagi yai homu eyu godolo mu yao. Tama te we bidi godolo mu ebo kolesaga, te tebogo te augwaligo ebo dwai şe sula tagalabo kolesaga dao.^t ⁹Tama tibaso te kolesaga yao. Tama te kolesaga eyu, te dwagi yai homu eyu, tama duga hasi dage deli deligo te gasa we bidi dali te nai gesebo şe yao. ¹⁰Tama God agai te dage deli delibolo te haniani tau sabo homu kolesaga olo mena mena pai dao. Agai tama tialigo da, dage deli deligo te olo mani homu kolesaga ebogo gasa we bidi tau sao. Tama dagego tama tiyu da, teda dage te Godigo olo mani tau sabo homu kolesaga bugagia tonalubo we bidi mu bidaibao. ¹¹Tama dage deli deligo te haniani şe eyu, tama te po ola mabo bidi agai te Godigo po ola mao. Tama te gasa we bidi tigi tau sabo şe yabo bidi me, agai te Godigo agabolo mabo bomogo te şe yao. Tama te tiwai yao, tama dage Jisas Kraissde wadolama, tama tigidali şede Godigo nogi ugwaba somainogo te tiwai yao. Te God aga te moni ula yai nogi dali, te tigidali nai tonalubo bomu dali si te sesemane sogo elalua peyu, elalua paibao. Te tiwai emainao. Mu dao.

¹²Eno abagi mu dede, te dageba te dwai usu sabo sogo megi pedalobo. Tama te şede te gasagi yai konesişbo şe dao homu eyu, dagego noma sigimio. Woo, te menio. ¹³Dagego te Kraiss aga dene sali tiwai te dagede me te dene tolobo şe meba megi tama siyu ebaso, tama dage dwagi yai homu yao. Tama nosali aga ma asobo si, aga bomu yai ula te sogo hanilibo si, te dagego aga dene meba ede sobaso tama dage te sogo me te didibili eyu moni dwagi yai homu yaibao. ¹⁴Tama dage Kraiss wali pobaso augwaligo dage dali te nogi posobo dwai po weyu da, teda dage dwagi yai homu yao, God aga moni ula yai Mobo Bidi aga dage dali bugagia bidibaso. ¹⁵Me ma, dage tomode bidi me deli agai te bidi ela mubo şe, ma te nai wi sabo şe te si ilamuo, te tobage şe ebode dene sigio. Dagego dwai şe ebaso dene sigimio. Ma, te kolesaga hagoma eyu, gasa bidi dabe dali augwali tonalubo bidigo po weyu bidigio. Te tobage şe ebode me te dene sigimio. ¹⁶Tiali ma dage te Godigo po wali pabo we bidi bidibaso tama tede augwaligo dage dene mayu da, teda dage hale ilamuo. Woo, te menio. Dagego te nogi te Godigo po wali pabo we bidi nogi elalubaso te Godigo nogi ugwaba siyu, nage usu da po agabolo wao.

¹⁷Magi baso meni. Te Godigo we bidi osola subo bodolu mani sogo paşa yagasai dao, tama agai te aga hani we bidi dali te osola suyu, te

^t 4:8 Prs 10:12

po tų ebo şę gagalaibao. Tama da, te da Godigo po wali pabo we bidi hani dao. Tialima God agai te po tų dodolobo şę gagalainogo eyu, tama hasia bolo agai te da aga hani we bidi dali te şę yaibao. Tama tibaso da, te Godigo gesi dwagi yai po odobo hagela yai we bidi dabe, nosali agai augwali dali te po tų ebo si, te augwaligo genuai dene mu saibao. ¹⁸Tama te aşani po tiwai,

“Te doloba pai bidi, te tobage bidi Godigo agabolo dene hasia mayu, tama nosali God agai te bidi ma dobola sabo dao. Tama te doloba pai bidi dali tama tialigo da, teda te Godigo po sela şayų dwai şę yali bidi te aga dali te Godigo magi yaibawe?”^u

te po aşani. ¹⁹Tama tibaso, God agai “Awe” weyu, tama dage dene siyu da, teda dagego dwagi yai şę naga ebogo dagego duga digi God nogoba muao. Te God aga digi agai dage nigali, te agai dage tau siyu ma dobola sabo bommo te munu me siligobeo.

5 ¹Tama tibaso, megi eno te dage Godigo hani we bidi tonalubo bidi dabe dali e homu keņa sabo po obao. Ena digi me ena da te Godigo hani we bidi tonalubo bidi dao, te dage tiwai. Tama eno gedugo Krais aga dene sabo suai bidi dao. Tama aga ma asiyu, tama aga bommo yai ula pedalobo si, te sogo ena te bommo yai ula meba sabo bidi me bidaibao. ²Tama te homu keņa sabo po e dao: te kibu sipsip tonalubo bidi agai te kibu sipsip bugagia tonalubogia tama dagego te Godigo dagego nogoba muani we bidi bugagia tonalualo. Tama te şede augwali tonalubo hagela homu eyu tama tonalugio. Woo, te menio. Dwagi yai homu naga eyu, dagego augwali bugagia tonalualo. Tama dagego te masigi naga somainogo te şę egimio. Te menio. Dagego homu mu bommo eyu, te augwali tau somainogo te şę yao.^v ³Tama kolesaga hagoma elama, tama dwai homu eyu te Godigo dagego nogoba muani we bidi tama tonalugio. Woo, te dage te dwagi yai şę ebo tųdu polasa pao, te augwali dage wali asomainu, te kibu sipsip augwali te augwali tonalubo bidi wali pomainogo aga polasa pabo tiwai gilama yao. ⁴Tama dage te kibu sipsip tonalubo bidi dabe tiwai bidiyu, tama Krais aga te sipsip tonalubo bidi dabego tuni bidi mu tiwai dao. Tama aga ma asiyu hanilibo si, te sogo dagego te bommo yai ula saibao, te bomonama udayu nai sabo bidi agai te wiegi yai tobolu au yabo nai sabo tiwai. Tama agai au yabo nai osogo elaluyu dolai goli, te dagego sabo bommo yai ula te dolisiqbo nai mu dao.

⁵Te dage gesi bidi dabe, dage me te dolo kolesaga eyu, te tonalubo bidi dabe dologode bidiyu, augwaligo wabo po bugagia odiaq. Tama dage we bidi me, dage tigidali te nagamea pai homu eyu, tama te olo şę ebo we bidi tiwai bidiyu, dage tomode duga hasi te tau sabo şę yao. Magi baso

^u 4:18 Prs 11:31 ^v 5:2 Jon 21:15-17

meni, te Godigo po bukude te nagamea pai homu ebo kolesagade e po elalubao,

“God agai te kolesaga hagoma ebo we bidi dali boi
bidi homu eyu, bomo elama dolalubo dao. Tialima
te nagamea pai homu ebo we bidi dali agai te olo
tau sabo kolesaga ebo dao.”^w

⁶Tama tibaso, te nagamea pai homu eyu, God agai genuai bomo elalubo nogo dologode bidiào, te agai bodolu mani sogo asobo si agai dage ugwaba somainogo tama bidiào.^x ⁷Tama bidiyu, tama God agai dagede homu eyu, tama agai dage bugagia tonalubaso te dagego moni homu ebo sę tigidali aga nogoba muiào.

⁸Te dagego duga homu bugagia dodolao, tama bugagia tonaluo. Te dagego boi bidi Satan aga susa bilibo dao. Te moni hasa nogi laion, te aga nasi baso bomo elama, tama moni hwa olama gaa weyu aga tuabo nai gegeyu bilibo dao. Tama te boi bidi Satan aga te tiwai eyu susa bilibo dao, te dage dolainogo ebo dao. ⁹Tama dagego duga Godide konealubo homu bugagia daų olama, tama dolaluyu te boi bidi sela sayao. Dagego koneani, te augwaligo dage dene mabo tiwai gilama eyu, te gasa bidi dabego te Godigo hani we bidi tigidalibolo te tobage dene mabo dao, te tigidali tođe. ¹⁰Tama dagego te seęę osogo tolama, tama God aga digi agai dage sese bugagia ma ilama, tama dage bomu menama, bugagia mu daų waibao. Te God aga da te tigidali wiegi yai olo tau sabo kolesaga page bidi dao, tama agai dage i wali, te dage Kraisi wali peyu, te Godigo bomu yai gamonabo ula meba dagego somainogo yali. ¹¹Eno homugo te God aga te tigidali nai tonalubao bomu sesemane sogo elalua peyu, elalua paibao. Te tiwai emainao. Mu dao.

Po silagasu wabo po

¹²Te bidi nogi Sailas agai ena tau siyu, tama eno e pewadage po dagebolo aşena tolobao. Tama eno homu te bidi Sailas da te aga nogoba muani sę bugagia tonaluyu sę ebo bidi dao. Tama eno e po dagebolo aşeyu, tama bomu elama eno dage homu keņa sabo po weyu, tama te eno aşani po te God agai aga we bidi olo tau sabo kolesaga mu dao. Tama tibaso, te kolesaga bugagia daų olama, tama dolaluyu bidiào.

¹³Te Godigo hani we bidi meba augwali te bulu nogi Babilon tede augwali bidibao. Tama Godigo augwali te dage dali te hagea sai dao. Tama te we bidi dabe dali, te eno ogwa tiwai bidibo bidi nogi Mak dali, augwaligo dagebolo te dage bugagia bidao po obao. ¹⁴Tama dage me duga hasi pagea siyu, tama gasa we bidi bugagia bidao po wao. Tama eno homugo te dage Kraisi wadolai we bidi dage tigidali te homu keņa bugagia bidiào.

^w 5:5 Pro 3:34 ^x 5:6 Mat 23:12; Luk 14:11; 18:14